

Den campaña bo ta conoce con negativo candidatonan ta

Nos por ripara cu campaña electoral di e aña aki lo no diferencia casi nada di campanhanan den pasado.

For di awor caba a cuminza kibra personanan nobo riba partidonan y tambe esnan cu lo por ta un "peliger," of considera di lo por colecta basta voto.

Otmar Oduber den transcurso di añanan a desaroya su mes políticamente y a bira un peliger pa otro partido.

Mester por tin un miedo di Otmar cu mester trata di kibre mas tanto posibel y sake for di reunionnan di parlamento cu polis pa manche como parlamentario.

Mike de Meza a bay di PPA pa AVP y e tampoco no a scapa critica, pasobra lo tin temor cu e lo hala voto di mas na San Nicolas unda e ta popular.

For di su partido anterior, el a cuminza haya su criticanan di "mancha" cara. Otro partido a cuminza tilde di "bulador di cura caba",

Monica tambe a haya su criticanan di "mancha" cara, awor cu el a lanta su propio partido.

Mester tin un temor di dje cu a cuminza baha riba dje tambe.

Dr. Vallejo a haya su parti, buscando pa trece discordia den DR, y despues ta **Trudy Hassell** a cuminza bira e victima pa trata na kibra, pasobra lo tin temor cu nan lo haya hopi voto.

Mester trata na crea un discordia den DR entre dirigentenan, **Dr. Vallejo** y **Trudy Hassell** pa hende no vota riba nan.

Pader Lampe ta haye debi na su profesion di religioso y mesclamento di religion cu politica, como si fuera ta prohibi pa e haci esaki.

Benny Nisbet ta victima desde cu a bini e split den su partido.

Su partido ta canando mancaron y e lo tin dolor pa cura e herida.

Dr. Visser a scapa te awor, pero e conoci cu e ta, lo haci cu lo busca "motibo" pa caba cune tambe.

Cornelius Wilson na San Nicolas ta popular tambe y su introducion di partido Summum Bonum tambe ta poni riba lista di wordo kibra, djis pasobra el a expresa e palabra cu nos no kier tende, cu ta e palabra "discriminacion" y hopi, sigur lo no a compronde su expresionnan y splicacionnan.

Ministronan y parlamentaronan di MEP ta haya "hala di pali funchi" tur dia pa nan gobernacion.

Asina lo sigui contra tur persona cu lo por ta un halador di voto y cu rivalnan cu lo tin temor di nan, y cu lo mester wordo kibra.

E otro manera di kibra hende ta di cuminza na plama afor di awor caba, kico negativo nan lo a haci den pasado cu aparicion dilanti huez of no.

Nan ta "saca keeshi" di tur candidato nobo of bieu pa influencia votadornan.

Pesey mi semper a bisa cu si bo tin un mancha negativo den bo bida, aunke con chiquito esaki por ta, of si bo tin "manteca riba bo cabez", prepara pa e mancha aki bira un oceano scur si bo drenta den politica, y cu e manteca lo smelt.

For di añanan 50 te awe, loke bo welo, wela, tata, of mama a haci den nan bida, ta wordo tira publicamente riba bo, si no tin nada otro pa tira riba bo.

Pero si den bo infancia bo a subi mata di mango di bisifia pa "presta" algun mango, y bisifia a duna bo un sota, prepara pa den politica bo wordo tilda di ta e "ladron di mas grandi" cu Aruba a conoce.

Nan lo no yamabo ladron, pero si insinua den e direccion ey.

E OTRO CARA DESPUES DI ELECCION

Despues di eleccion ta ora cu bo ta bay conoce e candidato riba kende bo a vota, segun e tradicion ta na Aruba.

Durante campaña el a primintibo cielo pa bo voto. El a dunabo 100 florin pa cumpra cuminda of paga awa. El a pagabo pa pone borch di bandera na cas.

Despues di eleccion el a bira parlamentario, y no conoce bo mas.

Ta manera un di nan a bisa: "Como candidato mi ta priminti, pero como parlamentario, mi tin cu papia otro".

E otro tambe cu ta bisa mescos cu hopi otro: "Den campaña mi a papia como politico, y no personal", of "den campaña mi a expresa mi mes políticamente".

Despues di campaña bo no ta mira bo candidato parlamentario mas.

E no tin tempo pa bo mas.

Bo no por yega cerca bo ministro candidato, y mester pasa via porta di baño, pasa pa porta di cushina, drenta camber, pasa di sala y den tur di nan bo ta limita, pasobra e porta di oficina (of despacho manera nos gusta bisa awendia) ta na yabi y yabi ta benta afo pa votadornan.

Riba caya y na ocasionnan social cu bo topa cu nan, e contesta ta: "pasa cerca mi na oficina! Bisa nan cu ta ami mes a pidibo pa bin!".

Bo no ta haye pa mira toch!

CAMPAÑA LIMPI E AÑA AKI ATROBE

El a cuminza na chiquito caba y no a drenta publicidad.

Esaki ta e kibramento of bahamento di borch di candidatonan di rival politico.

Esaki nos lo tende hopi di dje den e simannan venidero.

Nos lo tende di bringamento pa motibo politico y cu ta "tal politico" a manda su hendenan pa bringa.

"Tal politico" nunca sa di algo y no sa nada di loke a pasa tampoco. Semper nan ta inocente.

Den prensa nos ta bin haya masha comunicado di candidatonan nobo y bieu cu ta mas experto riba nan tereno cu expertonan mes. Di cada partido lo nota cu cada candidato ta expresa su mes riba tereno so, pa asina tur por cubri cantidad di tereno.

Lo nota den e simannan venidero cu un politico no por expresa su mes, sea na radio of television of den comunicado, sin "tira palabra" den direccion di su rival(nan).

Mester tin "politiqueria" den e expresion, y pa nan, e 100 frase nan bunita expresa no tin balor.

Balor ta e "pida expresion di puña politico" ta esey ta importante pa lesa of scucha.

FALTA DI RESPET OF KIBRA ORDEN

Nos ta bin haya hopi situacion den cual ta falta respet pa otronan, pa motibo politico.

Orden y reglamentonan lo ser kibra, djis pa politica y interesnan scondi.

Un di nan ta e problema na Marinierskazerne algun dia pasa, unda cu a prohibi un empleado di kustwacht drenta cu auto, pasobra su auto tabata disfrazado políticamente.

Aki por a ripara cu falta di respet pa institucionnan y instancianan a cuminza tuma lugar. Kier kibra orden y reglamento y pa politica partidario.

Sindicato ta yega pero no pa atende e asunto manera mester ta y mustrandu riba respet cu mester tin pa reglamentonan, pero ta laga sa mes ora cu awor ta bay regla loke pa basta dia caba mester a wordo regla.

Un excusa a ser haya cu e asunto aki pa "awor si" bay regla asuntunan cu pa "basta dia" mester a wordo regla.

Casonan cu indole politico manera esaki, ta locual nos lo haya hopi e simannan venidero, y partidonan lo piki cada punto di hangua cu nan haya pa mete den e casonan aki.

Si algo bin riba San Nicolas of pasa na San Nicolas, of si un persona di San Nicolas ta envolvi den kico cu ta cu a bira noticia, politiconan manera zamuro lo tey pa expresa nan mes of pa laga nan cara wordo mira. San Nicolas ta keda e "mina di oro" di politica na Aruba, y atrobe yen di: "promesa, promesa y mas promesa!!"

Juby Naar

PA TUR OCASHON
YAMA
CITY ONE
NA TEL: 583-3888

Bo kier fura bo matras?



• Ta revisa bo matras completamente
• Bon calidad di Tela
• Borda cu extra foam pa mihor support
• Busca mainta y entrega atardi

SLEEP COMFORT
MATTRESS & FOAM COMPANY N.V.
Sabana Blanco 34-A
Tel. 582-2709 of 582-4405

Nos ta e mihor opcion!

TELEFONNAN
DI DIARIO
582-6747
FAX
582-8551